

दिनांक 05.09.2024

समय: 18.45 बजे

आकाशवाणी जयपुर-अजमेर
प्रादेशिक समाचार

- शिक्षक दिवस रे मौके राष्ट्रपति द्रौपदी मुर्मू राजस्थान रा दो अध्यापकां समेत 82 शिक्षकां ने राष्ट्रीय स्तर माथे नवाजा।
- प्रदेश मांय स्वास्थ्य सेवावां ने मजबूत बणावण रा मकसद ऊं चिकित्सा मंत्री गजेन्द्र सिंह खींवरसर जोधपुर ऊं संभाग स्तर री बैठकां री सरूआत कीनी।
- राज्य मांय केई ठौड़ां भारी बारिश-आवता 4-5 दिन लंकाऊ अर ऊगणी जिलां मांय कठे-कठे घणी जोरदार बिरखा रा आसार।
- जैसलमेर जिला रा रामदेवरा मांय बाबा रामदेव रो मेळो आज रीत मुजब सरू व्हयो।

000

पैली वाळा राष्ट्रपति डॉ. सर्वपल्ली राधाकृष्णन ने आज वां रा जन्मदिन रे मौके सिरधा भाव सागे याद कर्या जा रह्या है। वां रो जन्मदिन शिक्षक दिवस रा तौर ऊं मनायो जावे है। ई मौके राष्ट्रपति द्रौपदी मुर्मू बेहतरीन काम करण वाळा 82 शिक्षकां रो नई दिल्ली मांय राख्यी ज्या खास कार्यक्रम मांय मान कीनो। आं मांय प्रदेश रा ई दो अध्यापक श्रीगंगानगर जिला मांय पदमपुर रा बलजिन्दर सिंह बराड़ अर बीकानेर रा हुकम चंद चौधरी शामिल है। बलजिन्दर सिंह कबाड़ ऊं जुगाड़ रे जरिये विद्यार्थियां ने न्यारी-न्यारी सीख दीनी। ई मौके राष्ट्रपति कह्यो के विद्यार्थियां रा बेहतर प्रदर्शन मांय शिक्षकां री महती भूमिका व्हे है।

.....

प्रधानमंत्री नरेन्द्र मोदी ई देश भर रा शिक्षकां ने शुभकामनावां दीनी है। सोशल मीडिया पोस्ट रे जरिए वे कह्यो के नौजवानां रा विचारां ने दिशा देवण मांय शिक्षकां रा काम रा प्रति आभार जतावण रो मौको है। राज्य मांय ई शिक्षक दिवस रे मौके न्यारा-न्यारा कार्यक्रम राख्यी ज्या। राज्य स्तर रो जळसो जयपुर मांय राख्यी ज्यो जठे मुख्यमंत्री भजनलाल शर्मा बेहतरीन काम करण वाळा शिक्षकां रो मान कीनो। ई मौके वे कह्यो है के महंगा साज-ओ-सामान अर सुबीतां ऊं चोखी स्कूलां नी बणे है बल्कि शिक्षकां री निष्ठा अर समर्पण ऊं बणे है। वे आज जयपुर मांय राख्यी ज्या शिक्षकां रा राज्य स्तर रा मान जळसा मांय बोल रह्या हा। मुख्यमंत्री महिला शिक्षकां रा काम री सराहवणा करता थकां कह्यो के देश बणावण मांय महिलावां रो मोटो योगदान है। वे कह्यो के सरकार शिक्षा ने बधावो देवण सारू लगातार जतन कर रही है।

.....

कार्यक्रम मांय मुख्यमंत्री विद्यार्थियां ने टेबलेट ई दीना।

राज्यपाल हरिभाऊ किशनराव बागड़े ई किशनगढ़ रा राजस्थान केन्द्रीय विश्वविद्यालय मांय राखी ज्या कार्यक्रम मांय शिक्षकां रो मान कीनो। वे कह्यो के शिक्षक विद्यार्थी री जिन्दगी बणावण सागे वां ने चोखा संस्कार दे र बेहतर इंसान बणावे है। राज्यपाल कह्यो के आला दर्जा री भणाई मांय गुणवत्ता माथे खास ध्यान दियो जावणो चाहिजे। राज्यपाल केन्द्रीय विश्वविद्यालय मांय सूरज री रोशनी ऊं 700 किलोवाट बिजली बणावण री परियोजना ई जनता ने सूपी। अलवर रा गोरी देवी कॉलेज मांय वन अर पर्यावरण मंत्री संजय शर्मा डॉक्टर सर्वपल्ली राधाकृष्णन री मूरत रो अनावरण कीनो। सवाईमाधोपुर मांय राखी ज्या कार्यक्रम मांय शिक्षकां अर भामाशाहां रो मान करी ज्यो। सांचौर रा सरकारी कॉलेज मांय भारत में गुरु – शिष्य परंपरा : अतीत, वर्तमान एवं भविष्य” मुद्दा माथे अर चितलवाना रा कॉलेज मांय शिक्षक शिक्षा व समाज मुद्दा माथे संगोष्ठी राखी ज्यी। सिरोही, टोंक, हनुमानगढ़, गंगानगर, बांसवाड़ा, बाड़मेर, केकड़ी, करौली समेत न्यारा-न्यारा जिलां ऊं शिक्षक दिवस रे मौके शिक्षकां रा मान मांय जळसा राख्या जावण रा समाचार मिल्या है। शिक्षक दिवस रे मौके प्रदेशभर मांय 55 हजार 800 होशियार विद्यार्थियां ने टैबलेट दिया ज्या।

000

चिकित्सा अर स्वास्थ्य मंत्री मंत्री गजेन्द्र सिंह खींवर स्वास्थ्य सेवावां ने मजबूत बणावण अर वां माथे निगराणी राखण सारु संभाग स्तर माथे समीक्षा बैठकां सारु कीनी है। ई रा तैत पहली मीटिंग जोधपुर रा डॉ. संपूर्णानन्द मेडिकल कॉलेज मांय राखी ज्यी। मीटिंग मांय खींवर कह्यो के राज्य सरकार हर गांव-ढाणी तांई ईलाज ऊं जुड़्या बुनियादी ढांचा ने मजबूत बणावण सारु सगळा जरूरी जतन कर रही है। वे कह्यो के जिला स्तर माथे ई ऐड़ी बैठकां राखण रो प्रस्ताव है। चिकित्सा मंत्री मौसमी बीमारियां रो पसारो रोकण सारु पुख्ता प्रबंध करण रा हुकम दीना।

चिकित्सा अर स्वास्थ्य विभाग री अतिरिक्त मुख्य सचिव शुभ्रा सिंह ई जोधपुर रा महात्मा गांधी अस्पताल रो दौरा कर र व्यवस्थावां रो जायजो लीनो।

000

राज्यसभा उप चुनाव मांय राजस्थान ऊं चुणी ज्या भाजपा रा रवनीत सिंह बिडू ने आज नई दिल्ली मांय राज्यसभा सदस्य री शपथ दिरायी ज्यी। राज्यसभा रा सभापति अर उपराष्ट्रपति जगदीप धनखड़ वां ने शपथ दिरायी।

000

उपमुख्यमंत्री दिया कुमारी आज शाहपुरा जिला रा बीरधोल गांव मांय महाराणा प्रताप री मूरत रो अनावरण कीनो। ई मौके वे कह्यो के महाराणा प्रताप री मूरत म्हाणा मान, बलिदान अर वीरता री अनमोल धरोहर है, जो आवण वाळी पीढ़ियां ने हमेशा प्रेरित करेला। दिया कुमारी कह्यो के राज्य री मौजूदा सरकार बजट मांय महाराणा प्रताप ऊं जुड़ी न्यारी-न्यारी ठौड़ां ने जोड़बा माथे खास ध्यान दे रही है। वे कोटड़ी मांय चारभुजाजी अर जहाजपुर मांय स्वास्तधाम रा दर्शन ई कीना।

000

प्रधानमंत्री आदिवासी न्याय महाअभियान-पीएम जनमन रा तहत बारां जिलो देश मांय दूजी ठौड़ हासिल कीनी है। जिला कलेक्टर रोहिताश सिंह तोमर आ जाणकारी दीनी। वे बतायो के ई रा तहत जिला मांय मंजूर करी ज्या 16 हजार मांय ऊं साढ़े 3 हजार मकान बण गया है अर आरडीएसएस रा तैत 17 हजार मांय ऊं हाल तांई 15 हजार कनेक्शन दे दिया ज्या है। तोमर बतायो के जिला मांय 23 अगस्त ऊं 10 सितंबर तांई आईईसी कैपेन रा तैत खास शिविर लगा र आदिवासियां ने सरकारी योजनावां रो फायदो दियो जा रह्यो है।

000

प्रदेश रा केई जिलां मांय तेज बरिश व्हे रही है। लारला 24 घंटा मांय बूंदी, भीलवाड़ा, करौली, जोधपुर, बाड़मेर, टोंक अर जयपुर जिलां मांय केई ठौड़ां जोरदार मेह बरस्यो। बूंदी जिला रा नैनवा मांय सब ऊं बत्तो 141 मिलीमीटर पाणी बरस्यो। दूजी कानी जोधपुर संभाग मांय दो दिन मांय व्ही बिरखा पाछे आज हालात मांय सुधार व्हयो। जोधपुर-जैसलमेर रेलवे लेण माथे आज गाडियां री आवण-जावण ओजू सरू व्हे गयी। भारी बरिश ऊं ई लेण री पटरियां हेटे ऊं मिट्टी बह जावण रे कारण रेलों री आवण-जावण माथे असर पड़यो हो। सवाईमाधोपुर जिला मांय लगातार व्हे रही बरसात रे कारण 12 ऊं बत्ता छोटा-मोटा बंधा माथे चादर चाल रही है। सवाईमाधोपुर रा जिला कलेक्टर डॉ. खुशाल यादव बौली हलका रा मोरेल बंधा माथे चादर चालण पाछे आज हालात रो जायजो लीनो। भीलवाड़ा जिला अर शहर मांय आज ई जोरदार मेह बरस्यो। शाहपुरा जिला मांय ई लगातार व्हे रही बिरखा रे कारण फूलियाकलां मांय खारी नदी री पुलिया माथे पाणी बेह रह्यो है। ई कारण शाहपुरा-केकड़ी गेलो बंद व्हे गयो है। केकड़ी जिला मांय व्हे रही भारी बरिश रे कारण खारी नदी मांय पाणी उफण रह्यो है। सलूबर जिला मांय लगातार व्हे रही बिरखा रे कारण मानपुरा नदी मांय उफण रह्या पाणी ऊं खारवा चांदा रो जिला मुख्यालय ऊं संपर्क टूट गयो है। सांचोर मांय आज करीब दो घंटा ताई जोरदार मेह बरस्यो। सिरोही जिला मांय माउंट आबू समेत न्यारी-न्यारी ठौड़ां रुक-रुक र व्हे रही बिरखा ऊं नदी-नाळां मांय लगातार पाणी आ रह्यो है। माउंट आबू मांय बह रह्या न्यारा-न्यारा झरनां ने निरखण सारू मोकळा सैलाणी पूग रह्या है। डूंगरपुर मांय आखा दिन रुक-रुक र पाणी बरस्यो। पाली मांय व्हे रही बिरखा ने ध्यान राखता थकां जिला कलेक्टर जनता ऊं सावधानी राखण री अपील कीनी है। भीलवाड़ा रा जिला कलेक्टर नमित मेहता एस.पी. राजन दुष्यंत सागे गोवटा अर जेतपुरा बंधां रो दौरा कर र अहलकारां ने जनता री हिफाजत सारू वां ने बंधा रा पाणी ऊं दूर राखण बाबत् जरूरी व्यवस्था करण रा हुकम दीना। करौली रा जिला कलेक्टर नीलाभ सक्सेना हिण्डौन हलका मांय घणी बिरखा रे कारण पाणी रा भराव वाळा जाटव बस्ती अर दूजा हलकां रो दौरा कर र अहलकारां ने जरूरी हुकम दीना। टोंक मांय आज सिंज्या छांटो-छिड़को व्हयो। जिला रा बीसलपुर बंधा मांय पाणी रो लेवल 315 दशमलव 19 आर एल मीटर व्हे गयो है। मौसम केंद्र जयपुर रे मुजब राज्य रा ऊगणी हलका मांय आवता 4-5 दिन चौमासा री चोखी बिरखा व्हेवण रा आसार है। ई दौरान लंकाऊ अर लंकाऊ-ऊगणी हलकां मांय कठे-कठे भारी तो कठे-कठे घणी भारी बिरखा रा आसार है। 10 सितंबर ऊं भारी बरिश मांय कमी आवण री संभावना है। जोधपुर अर बीकानेर संभाग रा कुछ हलकां मांय आवता तीन दिन कठे-कठे भारी बरिश व्हेवण रा आसार है। बीकानेर संभाग मांय 8 अर जोधपुर संभाग मांय 9 सितंबर ऊं बिरखा मांय कमी व्हेवण रा आसार है। ई बीचे चौमासा री रूत मांय आंख्यां रा संक्रमण कंजक्टिवाइटिस री शंका ने ध्यान राखता थकां चिकित्सा विभाग सावचेत रहवण री राय दीनी है।